



A fasevin schifo, al è clâr, ma il biel e il brut a son simpri relatîfs.

Lui, par esempi, al jere biel, ma no lu cagave nissun e anzit, i stevin duçj lontans, ancje se lui, par dîle dute, nol puçave neancje un pôc. Lôr sî, invezit, ma dome a spaurîlis. E po... I fasevino schifo, forsit, a lis gjalinis e ai sturnei? No di sigure. E alore ancje lui al veve tacât a cjalalis cuntun altri voli e a imagjinâ une idee grande, di chês che a puedin cambiâ une vite. Lôr a jerin tantis, tantissimis, e par podê educâlis ben, e no insegnâi magari, a une dôs voltis une robe, e magari nuie a une altre, al veve decidût di clamâlis par non. Cussì al veve tacât a butâ jù une liste di nons pussibî, e lis veve batiadis, une a la volte. Artemisia, Bertina, Selene, Cassandra, Fresia, Maria Zita, Ghirarda, Ofeliana, Ludmilla, Quantica, Anna Cosetta... Lis cjalave ben, prime, e dopo li batiave cuntun stecut, rabaltantlis e lassantlis a remenâsi un pôc, che lu scoltassin intant che i cjararave.

Ma subit al jere saltât fûr un problema: al veve cjatât dôs zimulis! Pobon... se a jerin companis, par chel che i coventave a lui, al podeve ancje risolvile cussì: Bertina 1 e Bertina 2. Purtrôp, cuant che al jere rivât a Cassandra 12 e Menocchia 17 al veve capît che nol podeve lâ indenant cussì... i pareve une liste di satelits artificiâi. Parcè che si jere inacuart che no jerin tantis: a jerin masse!

E alore? E alore nuie, nol jere tipo di fâsi avilî di problemas che no son problemas. Ancje i problemas a son relatîfs.

Se une robe a somee masse, baste metile dongje a une robe che e je di plui. E lui al jere pragmatic, e pratic, al veve sielt subite la uniche robe che al cognosseve che al jere sigûr de sô grandece. I numars!

E cussì lis veve rinomenadis cui numars. Une, dôs, trê, cuatri, cinc, sîs... e vie indenant, fintremai a velis finidis, plui o mancul cu la numar 68972. «Se cualchidune di voaltris e je

restade cence non», al veve dit ae fin, che domandi a chê in bande il sô e che si clamedi zontant un bis. Tipo tu, che mi pâr che ti ai dismenteade, jê, li in bande, si clame 4588, tu tu ti clamarâs 4588bis».

Al veve finît, ere ore. Rafaêl al podeve tacâ cui alenaments.

Deventâ un domatôr di budiesis e tirâ sù il plui grant circo di dut il mont, sul pedrât de loze di cjase di sô none, nol jere afâr di pôc. Al jere il progjet di une vite. E che a lessin a cagâ ducj chei cocâi che lu coionavin o compativin parcè che a jere ritardât. Ce vevino mai provât a fâ, lôr, di cussì grant!

**di Rafaêl Serafin**

*Note: nissune budiese e je stade feride par scrivi cheste conte.*

Share this:

[Print](#)

[Twitter](#)

[Facebook](#)

[Email](#)

[More](#)